

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI RABU, 1 MAC 2023, PUKUL 10.00 PAGI

Bil. 12

PERTANYAAN-PERTANYAAN BAGI JAWAB LISAN

1. PR-1521-L18152
Dato Anyi Ngau [Baram] minta **PERDANA MENTERI** menyatakan apakah jenis dan nilai bantuan yang disalurkan kepada mangsa-mangsa bencana alam seperti banjir dan kebakaran tempat kediaman pada masa sekarang ini.
2. PR-1521-L19142
Tuan Che Alias bin Hamid [Kemaman] minta **MENTERI PERDAGANGAN ANTARABANGSA DAN INDUSTRI** menyatakan pendirian pihak Kementerian berhubung dengan isu Perjanjian Komprehensif dan Progresif bagi Perkongsian Trans-Pasifik (CPTPP) yang begitu jelas memberi impak kepada sektor pertanian negara.
3. PR-1521-L19299
Tuan Syahredzan bin Johan [Bangi] minta **MENTERI KOMUNIKASI DAN DIGITAL** menyatakan statistik bilangan individu yang disiasat, didakwa dan disabitkan di bawah Seksyen 233(1) Akta Komunikasi dan Multimedia yang melibatkan hantaran atas talian yang lucah, sumbang, palsu, mengancam atau jelik sifatnya sejak tahun 2009 sehingga kini mengikut tahun dan jenis hantaran.
4. PR-1521-L18177
Datuk Muslimin bin Yahaya [Sungai Besar] minta **MENTERI PEMBANGUNAN USAHAWAN DAN KOPERASI** menyatakan keterlibatan serius koperasi-koperasi berkaitan dengan sektor agromakanan bagi membantu negara menghadapi krisis bekalan makanan pada masa sekarang dan akan datang.

5. PR-1521-L18962
Datuk Seri Panglima Madius Tangau [Tuaran] minta **MENTERI PERDAGANGAN DALAM NEGERI DAN KOS SARA HIDUP** menyatakan mengapa harga daging seperti ayam dan khinzir terus naik dan apakah langkah-langkah untuk menurunkan harga tersebut.
6. PR-1521-L19022
Tuan Sabri bin Azit [Jerai] minta **MENTERI SAINS, TEKNOLOGI DAN INOVASI** menyatakan jumlah inovasi pembuatan dron di Malaysia sebagai langkah bagi membantu golongan B40 dalam bidang pertanian.
7. PR-1521-L18453
Tuan Lo Su Fui [Tawau] minta **MENTERI PENDIDIKAN TINGGI** menyatakan Kementerian berhasrat untuk mewujudkan sebuah universiti yang merangkumi semua bidang pengkhususan dalam sebuah universiti di daerah Tawau bagi memenuhi keperluan pelajar di Pantai Timur Sabah.
8. PR-1521-L18060
Dato' Sri Ikmal Hisham bin Abdul Aziz [Tanah Merah] minta **MENTERI PERTAHANAN** menyatakan apakah status program penyelenggaraan Pangkalan Laut Tun Sharifah Rodziah (PLTSR) yang telah berfungsi selama tujuh tahun di Pantai Timur Sabah dan berapa bajet yang diperuntukkan bagi program *refit* pangkalan ini dalam memastikan anggota yang ditempatkan di pangkalan tersebut sentiasa mendapat kemudahan kondusif dan selesa.
9. PR-1521-L18812
Datuk Seri Panglima Bung Moktar bin Radin [Kinabatangan] minta **PERDANA MENTERI** menyatakan apakah tahap kesediaan agensi-agensi Kerajaan yang berkaitan dalam persediaan menghadapi ketidaktentuan keadaan cuaca sekaligus persediaan menghadapi kejadian Monsun Timur Laut. Apakah inisiatif Kerajaan dalam memastikan bantuan dapat segera disampaikan kepada mangsa yang terlibat serta kerja-kerja pembaikan segera terhadap kerosakan-kerosakan infrastruktur akibat kejadian bencana ini.
10. PR-1521-L19356
Datuk Wira Hajah Mas Ermieyati binti Samsudin [Masjid Tanah] minta **PERDANA MENTERI** menyatakan tentang hasil keberkesanan dan peratusan keluar mengundi UNDI18 yang telah diterjemahkan pada PRU15 ini dan apakah komitmen pihak Kerajaan dalam usaha secara berterusan bagi mendidik pengundi melalui Akademi Suruhanjaya Pilihan Raya pada masa akan datang.

11. PR-1521-L18994

Datuk Andi Muhammad Suryady bin Bandy [Kalabakan] minta **MENTERI EKONOMI** menyatakan apakah pelan strategik yang dirangka oleh pihak Kementerian bagi memastikan impak pertumbuhan ekonomi kesan daripada perpindahan ibu negara Indonesia ke Nusantara di Kalimantan Timur terutamanya dari segi perdagangan, pelaburan, perniagaan dan perindustrian turut dinikmati oleh Kalabakan dan Sabah khususnya.

12. PR-1521-L19240

Dato' Khilir bin Mohd Nor [Ketereh] minta **PERDANA MENTERI** menyatakan adakah sebarang perancangan untuk memberikan penambahan kuota haji Muassasah atau keutamaan kepada veteran ATM yang ingin mengerjakan ibadah haji.

13. PR-1521-L18069

Puan Wong Shu Qi [Kluang] minta **MENTERI KOMUNIKASI DAN DIGITAL** menyatakan jumlah perbelanjaan untuk menghantar SMS kepada semua pengguna telefon bimbit berkenaan maklumat atau perkhidmatan Kerajaan serta jumlah belanjawan yang diperuntukkan untuk perkhidmatan SMS tersebut.

14. PR-1521-L19137

Dato' Seri Dr. Shahidan bin Kasim [Arau] minta **PERDANA MENTERI** menyatakan tindakan yang akan dilakukan oleh Kementerian bagi membendung penipuan atas talian dan jenayah siber yang dilihat semakin berleluasa di Malaysia terutamanya melibatkan kes transaksi wang tanpa kebenaran daripada pihak pelanggan bank.

15. PR-1521-L18539

Dato' Indera Mohd Shahar bin Abdullah [Paya Besar] minta **MENTERI PERDAGANGAN ANTARABANGSA DAN INDUSTRI** menyatakan apakah perancangan Kerajaan bagi menggalakkan lebih banyak pelaburan berdasarkan pembangunan mampan yang akan mewujudkan kerjaya alaf baharu bagi generasi muda.

16. PR-1521-L18839

Tuan Haji Kamal bin Ashaari [Kuala Krau] minta **MENTERI PENDIDIKAN TINGGI** menyatakan tahap persediaan masa hadapan universiti dalam mendepani pembelajaran digital seperti yang telah dilaksanakan ketika Perintah Kawalan Pergerakan akibat penularan wabak COVID19.

17. PR-1521-L17948
Tuan Hassan bin Abdul Karim [Pasir Gudang] minta **PERDANA MENTERI** menyatakan usaha yang telah diambil oleh Kerajaan untuk memastikan kesemua 13 negeri di dalam Persekutuan Malaysia menggubal Enakmen Anti Lompat Parti di negeri masing-masing.
18. PR-1521-L18757
Dato' Hajah Mumtaz binti Md Naww [Tumpat] minta **MENTERI EKONOMI** menyatakan status pembinaan jambatan Palekbang - Kota Bharu yang bakal menjana perkembangan kepada ekonomi penduduk di jajahan Tumpat sebagaimana yang telah diumumkan oleh Perdana Menteri ke-9 baru-baru ini.
19. PR-1521-L17995
Tuan Tan Kok Wai [Cheras] minta **MENTERI SAINS, TEKNOLOGI DAN INOVASI** menyatakan sama ada Amerika Syarikat menjemput Malaysia untuk menyertai program Artemis serta pendirian Kerajaan mengenai program Artemis ini.
20. PR-1521-L19228
Tuan Mohd Syahir bin Che Sulaiman [Bachok] minta **MENTERI PERDAGANGAN DALAM NEGERI DAN KOS SARA HIDUP** menyatakan wahana dan kaedah yang telah dikenal pasti oleh Mesyuarat Majlis Tindakan Sara Hidup (NACCOL) terhadap cadangan pelaksanaan subsidi bersasar dengan mengambil kira kepentingan pengguna dan industri, khususnya untuk membantu golongan B40, M40, dan peniaga kecil.
21. PR-1521-L18435
Tuan Wong Kah Woh [Taiping] minta **PERDANA MENTERI** menyatakan sama ada Kerajaan bersedia mengubal Akta Perkhidmatan Parlimen seperti yang telah dicadangkan sebelum ini. Apakah tindakan yang akan diambil oleh Kerajaan untuk memperkasakan peranan Jawatankuasa Pilihan Khas Parlimen yang bakal ditubuhkan.
22. PR-1521-L18653
Puan Hajah Salamiah binti Mohd Nor [Temerloh] minta **MENTERI PERDAGANGAN ANTARABANGSA DAN INDUSTRI** menyatakan apakah formula Kerajaan bagi mengelakkan kenaikan kos barangan akibat daripada kenaikan tarif elektrik dalam sektor perindustrian yang pastinya akan memberi kesan langsung terhadap pengguna.

23. PR-1521-L19071

Tuan Gobind Singh Deo [Damansara] minta **PERDANA MENTERI** menyatakan apakah Kerajaan berhasrat untuk membawa Suruhanjaya Pencegahan Rasuah Malaysia (SPRM) ke bawah bidang kuasa Parlimen dan bukannya lagi di bawah Jabatan Perdana Menteri.

24. PR-1521-L19338

Dr. Radzi Jidin [Putrajaya] minta **PERDANA MENTERI** menyatakan sama ada Kerajaan akan melaksanakan janji-janji dalam manifesto Pakatan Harapan dan Barisan Nasional memandangkan Kerajaan pada hari ini adalah Kerajaan gabungan kedua-dua parti. Berapa implikasi kewangan kepada Kerajaan untuk melaksanakan janji-janji tersebut.

25. PR-1521-L18203

Tuan Khoo Poay Tiong [Kota Melaka] minta **PERDANA MENTERI** menyatakan :-

- (a) jumlah perbelanjaan oleh Suruhanjaya Pilihan Raya (SPR) dalam Pilihan Raya Umum ke-15; dan
- (b) mengapakah buku laporan bagi PRU14 (2018), dan PRN Sabah (2020), Melaka (2021), Sarawak (2021), dan Johor (2022) masih belum diterbitkan oleh SPR sepertimana untuk pilihan raya-pilihan raya sebelum ini .

26. PR-1521-L19364

Tan Sri Haji Abdul Hadi bin Awang [Marang] minta **PERDANA MENTERI** menyatakan apakah langkah Kerajaan untuk memastikan persempadanan semula kawasan pilihan raya akan dilakukan secara adil mengikut jumlah pengundi dalam Parlimen khususnya di kawasan dalam negeri Kelantan, Terengganu dan Kedah.

27. PR-1521-L18964

Tuan Jamaludin bin Yahya [Pasir Salak] minta **MENTERI PENDIDIKAN TINGGI** menyatakan apakah langkah-langkah Kementerian menjadikan universiti awam dan swasta di negara ini mampu melahirkan generasi muda dan cendekiawan berilmu yang seimbang daripada aspek akademik dan kerohaniannya.

28. PR-1521-L17984

Tuan Ganabatirau A/L Veraman [Klang] minta **PERDANA MENTERI** menyatakan perancangan Kerajaan untuk mengkaji semula persempadanan kawasan Parlimen dengan mengambil kira faktor-faktor seperti kesulitan atau kesukaran perhubungan, pengangkutan, keluasan kawasan, demografi serta bentuk geografi.

29. PR-1521-L19038
Tuan Muhammad Fawwaz bin Mohamad Jan [Permatang Pauh] minta **MENTERI PENDIDIKAN TINGGI** menyatakan jumlah pelajar IPTA dan IPTS daripada kalangan keluarga B40 di seluruh negara serta perancangan Kementerian untuk bantu ringankan beban pelajar.
30. PR-1521-L18281
Datuk Seri Dr. Noraini Ahmad [Parit Sulong] minta **MENTERI PENDIDIKAN TINGGI** menyatakan strategi mengatasi isu ketidakcukupan tempat di universiti awam, memandangkan Kementerian baru-baru ini mengumumkan tiada perancangan menambah bilangan universiti awam.
31. PR-1521-L18107
Dato' Wira Dr. Ku Abd Rahman bin Ku Ismail [Kubang Pasu] minta **MENTERI PERDAGANGAN ANTARABANGSA DAN INDUSTRI** menyatakan berapa jumlah pelaburan yang diterima oleh negara bagi sektor industri pembuatan dan perkhidmatan sepanjang tahun 2022 serta nyatakan perbandingan dengan pencapaian tahun 2021.
32. PR-1521-L18652
Puan Rodiyah binti Sapiee [Batang Sadong] minta **MENTERI SAINS, TEKNOLOGI DAN INOVASI** menyatakan peranan penting bidang sains, teknologi dan inovasi dalam menangani cabaran yang dihadapi masyarakat serta negara seperti perubahan iklim, jaminan makanan dan penyakit berjangkit.
33. PR-1521-L19220
Tuan Rushdan bin Rusmi [Padang Besar] minta **MENTERI KOMUNIKASI DAN DIGITAL** menyatakan apakah kesediaan Kementerian untuk mengimplementasi jalur lebar generasi ke-5 (5G) di luar Lembah Klang terutama kawasan di sekitar sempadan negara.
34. PR-1521-L18678
Tuan Afnan Hamimi bin Taib Azamuddin [Alor Setar] minta **MENTERI KOMUNIKASI DAN DIGITAL** menyatakan berapa bilangan akaun pengguna Tik Tok yang telah disekat dan sebab-sebab ianya disekat.
35. PR-1521-L18303
Tuan Lim Guan Eng [Bagan] minta **MENTERI KOMUNIKASI DAN DIGITAL** menyatakan usaha menangani malah membanteras gejala klip Tik-Tok yang bersifat fitnah, memainkan sentimen perkauman dan ekstremis yang menggugat keharmonian kaum dan agama serta tindakan ke atas anasir-anasir jahat ini.

36. PR-1521-L19211

Tuan Abdul Latiff bin Abdul Rahman [Kuala Krai] minta **MENTERI KOMUNIKASI DAN DIGITAL** menyatakan kesan yang timbul ke atas rangkaian komunikasi dan impak kepada pengguna di Kelantan selepas peralihan daripada 3G kepada 4G sepenuhnya pada 31 Disember 2021 dan bilakah pengguna akan mendapat manfaat sepenuhnya.

37. PR-1521-L19124

Dato' Rosol bin Wahid [Hulu Terengganu] minta **PERDANA MENTERI** menyatakan apakah langkah yang diambil Kerajaan untuk menjamin status halal dalam proses penyembelihan dan pengeluaran ayam segar di pasaran demi kepentingan pengguna beragama Islam.

38. PR-1521-L18520

Dato' Seri Haji Aminuddin bin Harun [Port Dickson] minta **MENTERI PEMBANGUNAN USAHAWAN DAN KOPERASI** menyatakan apakah ada program khusus yang berstruktur dan dana khas untuk pembangunan usahawan dan penjaja.

39. PR-1521-L18255

Datuk Seri Johari bin Abdul Ghani [Titiwangsa] minta **MENTERI KOMUNIKASI DAN DIGITAL** menyatakan berapakah anggaran kos keseluruhan projek 5G dan berapakah jumlah yang dibelanjakan oleh Digital Nasional Berhad (DNB) setakat Disember 2022.

40. PR-1521-L18740

Dr. Abd Ghani bin Ahmad [Jerlun] minta **MENTERI KOMUNIKASI DAN DIGITAL** menyatakan punca gangguan talian telefon mudah alih dan internet kerap kali berlaku mutakhir ini sama ada di pusat bandar atau pinggir bandar dan apakah inisiatif yang telah diambil untuk mengatasi masalah tersebut.

41. PR-1521-L18465

Datuk Seri M. Saravanan [Tapah] minta **PERDANA MENTERI** menyatakan adakah Jawatankuasa Tindakan Hal Ehwal Masyarakat India sudah mempunyai pelan tindakan bagi menangani isu rakyat selaras hasrat dan hala tuju Kerajaan dan apakah jawatankuasa tersebut mempunyai rancangan untuk meningkatkan sasaran ekuiti kaum India seiring visi dan kerangka Madani yang diilhamkan oleh Perdana Menteri iaitu maju dari segi pemikiran, bebas memberi pandangan dan memupuk perpaduan.

42. PR-1521-L19357

Tuan Ahmad Tarmizi bin Sulaiman [Sik] minta **PERDANA MENTERI** menyatakan isu penyelarasan silibus buku teks yang tidak seragam bagi keseluruhan sekolah KAFA negeri negeri di Malaysia, dan seterusnya memberi kesan kepada soalan-soalan peperiksaan Ujian Penilaian Kelas KAFA (UPKK).

43. PR-1521-L18130

Tuan Sim Tze Tzin [Bayan Baru] minta **PERDANA MENTERI** menyatakan sama ada Kerajaan bercadang untuk menjadikan pekerja kontrak pembersihan sekolah dan hospital, kembali sebagai kakitangan Kerajaan seperti sebelum perkhidmatan pembersihan diswastakan. Jika tidak, mengapa.

44. PR-1521-L19290

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI PERDAGANGAN DALAM NEGERI DAN KOS SARA HIDUP** menyatakan :-

- (a) strategi dan langkah-langkah yang akan diambil oleh Kerajaan untuk menangani masalah inflasi dan kenaikan harga barang serta meringankan beban kehidupan rakyat; dan
- (b) langkah-langkah jangka pendek dan jangka panjang Kerajaan dalam membasmi kemiskinan pasca pandemik COVID-19.

45. PR-1521-L18707

Tuan Roy Angau anak Gingkoi [Lubok Antu] minta **MENTERI KOMUNIKASI DAN DIGITAL** menyatakan apakah status pelaksanaan rangkaian 5G di Malaysia serta perancangan Kementerian untuk merapatkan jurang perkhidmatan komunikasi dan internet antara bandar dan kawasan luar bandar.

46. PR-1521-L19404

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERDAGANGAN ANTARABANGSA DAN INDUSTRI** menyatakan kedudukan pelaburan negara di luar negeri, nyatakan jumlah pelaburan dan syarikat-syarikat yang terlibat sepanjang tahun 2021 dan 2022.

47. PR-1521-L18351

Dr. Mohammed Taufiq bin Johari [Sungai Petani] minta **PERDANA MENTERI** menyatakan perkembangan terkini berkaitan siasatan mengenai pendedahan Pandora Papers dan adakah Kerajaan berhasrat membentangkan laporan siasatan tersebut di Parlimen.

48. PR-1521-L18581

Datuk Seri Haji Jalaluddin bin Haji Alias [Jelebu] minta **PERDANA MENTERI** menyatakan berapakah jumlah keseluruhan waris yang telah menerima bantuan khas sebanyak RM5,000 bagi pengurusan kematian COVID-19 di bawah NADMA.

49. PR-1521-L18398

Puan Syerleena binti Abdul Rashid [Bukit Bendera] minta **MENTERI KOMUNIKASI DAN DIGITAL** menyatakan statistik mengenai siasatan, tuduhan dan sabitan di bawah Seksyen 233 Akta Komunikasi dan Multimedia bagi setiap tahun untuk 5 tahun yang lepas.

50. PR-1521-L19192

Datuk Seri Dr. Ronald Kiandee [Beluran] minta **MENTERI PERDAGANGAN DALAM NEGERI DAN KOS SARA HIDUP** menyatakan sejauh mana pendekatan Kerajaan untuk memboikot kedai makan dan premis perniagaan berkesan dalam mengurangkan kos sara hidup yang sedang ditanggung oleh rakyat.

51. PR-1521-L18313

Puan Isnaraissah Munirah Majilis [Kota Belud] minta **MENTERI PERTAHANAN** menyatakan adakah Kementerian bercadang untuk mengecilkan kawasan lapang sasaran Kem Paradise Kota Belud atau memindahkan kawasan lapang sasaran ini ke kawasan Pantai Timur Sabah yang lebih berisiko menerima ancaman keselamatan.

52. PR-1521-L18012

Tuan Sanisvara Nethaji Rayer A/L Rajaji [Jelutong] minta **MENTERI KOMUNIKASI DAN DIGITAL** menyatakan langkah-langkah yang telah diambil untuk mencegah dan menghalang penyebaran maklumat dan kandungan palsu di media sosial yang boleh menggugat keharmonian dan ketenteraman awam di negara ini.

53. PR-1521-L19429

Tuan Zahir bin Hassan [Wangsa Maju] minta **MENTERI PENDIDIKAN TINGGI** menyatakan :-

- (a) kesan wabak COVID-19 terhadap pengambilan pelajar ke institusi-institusi pengajian tinggi awam dan swasta termasuk perbandingan angka pengambilan pra serta pasca wabak COVID-19; dan
- (b) langkah-langkah untuk merapatkan jurang pencapaian bilangan kemasukan pelajar.

54. PR-1521-L19105

Datuk Iskandar Dzulkarnain bin Abdul Khalid [Kuala Kangsar] minta **PERDANA MENTERI** menyatakan isu yang dihadapi di peringkat Kementerian susulan kekosongan jawatan Ketua Setiausaha Kementerian lebih setahun. Adakah terdapat campur tangan ahli politik dalam urusan ini.

55. PR-1521-L18167

Dato' Azman bin Nasrudin [Padang Serai] minta **PERDANA MENTERI** menyatakan adakah Kerajaan campuran yang dipimpin Pakatan Harapan bersedia untuk mengagihkan peruntukan secara sama rata kepada semua Ahli Parlimen termasuk pembangkang seperti yang tercatat dalam manifesto PRU-15 Pakatan Harapan.

56. PR-1521-L18889

Datuk Seri Takiyuddin bin Hassan [Kota Bharu] minta **PERDANA MENTERI** menyatakan apakah langkah tegas Kerajaan dalam menangani jenayah *scammer* secara panggilan telefon yang semakin berleluasa termasuk membuat peraturan bagi membolehkan pampasan dibayar kepada mangsa jenayah ini.

57. PR-1521-L19476

Dato' Seri Hishammuddin bin Tun Hussein [Sembrong] minta **MENTERI PERDAGANGAN DALAM NEGERI DAN KOS SARA HIDUP** menyatakan langkah Kementerian untuk meningkatkan kembali kuasa beli pengguna yang diunjurkan semakin menurun di mana nisbah hutang isi rumah Malaysia berbanding KDNK telah mencecah 84.5% dan pertumbuhan ekonomi Malaysia dijangka menyederhana kepada 4% pada 2023.

58. PR-1521-L18497

Dato' Haji Adnan bin Haji Abu Hassan [Kuala Pilah] minta **PERDANA MENTERI** menyatakan berapa jumlah mangsa dan kerugian yang terlibat dalam aktiviti penipuan dalam talian (*scam*) setakat tahun 2022 dan apakah intervensi yang telah dan akan dilakukan oleh Kerajaan untuk institusi perbankan terutamanya daripada aspek sistem keselamatan tersebut bagi pihak perbankan.

ATURAN URUSAN MESYUARAT DAN USUL-USUL

1. (D.R 2/2023) Rang Undang - Undang Perbekalan 2023 – **Menyambung semula perbahasaan atas masalah, " Bahawa Rang Undang-Undang ini dibacakan kali yang kedua sekarang," (28 Februari 2023)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

Menyambung semula perbahasaan atas masalah (28 Februari 2023)

2. (D.R 1/2023) Rang Undang-Undang Pencetakan Teks Al- **Bacaan Kali**
Qur'an (Pindaan) 2023. **Yang Kedua**
[Menteri Dalam Negeri]
3. **Menteri Kewangan** akan mencadangkan :-

“Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham.”

4. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan *dron*. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

5. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

6. PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

7. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

8. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

9. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

10. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

11. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

12. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

13. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

14. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

15. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

16. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

17. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

18. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

19. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

20. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

21. PR-1521-U(27)227

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

22. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, banciaan daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan

haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu."

[Menteri Pertanian dan Keterjaminan Makanan]

23. PR-1521-U(27)229

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcaj sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

24. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2023</u>	<u>RISALAT/DOKUMEN</u>	<u>TARIKH DIBENTANGKAN</u>
ST. 25	ORDINAN DARURAT (KUASA-KUASA PERLU) (PEMBATALAN) 2022 P.U. (A) 313/2022 yang diwartakan pada 6 Oktober 2022	1 Mac 2023
ST. 26	ORDINAN DARURAT (KUASA-KUASA PERLU) (NO. 2) (PEMBATALAN) 2022 P.U. (A) 314/2022 yang diwartakan pada 6 Oktober 2022	1 Mac 2023
ST. 27	ORDINAN DARURAT (KUASA-KUASA PERLU) (NO. 3) (PEMBATALAN) 2022 P.U. (A) 315/2022 yang diwartakan pada 6 Oktober 2022	1 Mac 2023
ST. 28	PROKLAMASI DARURAT (PEMBATALAN) 2022 P.U. (A) 316/2022 yang diwartakan pada 6 Oktober 2022	1 Mac 2023
ST. 29	PROKLAMASI DARURAT (NO. 2) (PEMBATALAN) 2022 P.U. (A) 317/2022 yang diwartakan pada 6 Oktober 2022	1 Mac 2023
ST. 30	PROKLAMASI DARURAT (NO. 3) (PEMBATALAN) 2022 P.U. (A) 318/2022 yang diwartakan pada 6 Oktober 2022	1 Mac 2023

****UCAPAN-UCAPAN
(PERATURAN MESYUARAT 17)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 01.03.2023 (Rabu)	1. YB Tuan Tan Kar Hing (Gopeng)	1. Projek Tebatan Banjir dan Naiktaraf Jalan Persekutuan di Kawasan Parlimen Gopeng	1. YB Menteri Kerja Raya
2. 01.03.2023 (Rabu)	2. YB Puan Young Syefura binti Othman (Bentong)	2. Isu Banjir di kawasan Parlimen Bentong	2. YB Menteri di Jabatan Perdana Menteri

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**